

La ultime publicazion de Societât filologjiche furlane e conten une racuelte piçule e ben curade, nassude de colaborazion cu lis diocesis furlanis.

» DI CHRISTIAN ROMANINI



Preieris pai fruts in furlan

Pai fedêi Diu al è l'onipotent, ven a stâi Chel che al pues dut. Duncje no si capis parcè che zirant pes glesiis dal Friûl al sedi cussì dificiil cjapâ une messe par furlan, cuasi che si ves pôre che il Pari nol capissi lis preieris par furlan.

Adiriture tal regolament dal 'seminari al jere parfin improibît fevelâ par furlan, come che nus ricuarde ancje pre **Antoni Beline** tal so innomnât libri "La Fabrice dai predis". Al è dibant cirî di platâ la evidence: come simpri al è l'om che al mostre ducj i siei limits e ancje se al puarte une tonie nol

è dit che al vedi simpri reson. Par fortune, sul teme de lenghe furlane in glesie a stan rivant segnâi positîfs: dopo agns di bataiis pe aprovazion dal Messâl Roman in lenghe furlane, il consei permanent de Cei al à metût in discussion te prossime assemblee ancje chest pont.

EFIETS DAL SPIRTU SANT

Forsit il Spirtu sant des Pentecostis al à decidût di anticipâ i siei efietis, forsit 50 agns dal Concili Vatican II a son avonde, forsit la Fieste dai 3 di Avrîl e scemence

a influençâ pardabon in alt. In cheste clime si pues ben di che e jentre ancje la ultime publicazion de Societât Filologjiche Furlane "Preieris pai Fruts", une racuelte piçule e ben curade, nassude de colaborazion cu lis Diocesis furlanis.

Pre **Loris Della Pietra**, diretôr dal Ufici liturgjic diocesan di Udin, che al à colaborât pe realizazion de opare, presentant il telâr dal libri al à fat presint che "Preparâ un imprest par fruts in lenghe furlane tal timp des gnovis tecnologiis e je une imprese coragjose che e intint ricognossi il valôr de lenghe mari te cressite globâl dai prins agns di vite e de preziositât de stesse pe sfere religjose. No vin di dismenteâ che il sintî religjôs al è leât a fuart a chel afietîf e ae emozion: imparâ a dî Diu te lenghe mari al à un savôr gjenuin, intim, tipic des robis 'natîvis' e inmò no 'costruidis': o sin inmò te prospettive de iniziazion ae fede e no de semplice istruzion religjose".

Il librut che al ven fûr tal moment fundamentâl dal an liturgjic pai cristians, ven a stai sot Pasche, si vierç cuntune presentazion dal arcivescul di Udin **Andrea Bruno Mazzocato**, che al scrîf propit ai 'fruts benedets', che ca di cualchi setemane a varan di frontâ la Prime Comunione.

"Ce grande fuarce che e à la preiere dai fruts" al scrîf Mazzocato "Chestis preieris a son te lenghe furlane, chel grant tesaur che o vin ingrumât tai secui e che no vin di pierdi". Al è di preâ che chestis peraulis e chest librut a vadin tes mans no dome dai fruts, ma ancje di cualchi grant che cun prejudizis e intolerance a sbelein il furlan.



ilfriuli@ilfriuli.it

■ PATRIE DAL FRIÛL Il ricuard di Pre Toni Beline

Al è jessût il numar di Avrîl da "La Patrie dal Friûl" (www.lapatriedal-friuli.org).

La prime pagjine e puarte une dediche in memorie di pre **Antoni Beline**, storic diretôr de riviste mancjât ai 23 di Avrîl dal 2007. La riviste e dediche diviers articui al teme des elezions e dai sogjets autonomiscj che a saran coinvoltis tes prossimis aministrativis. Ancje par chest mêis e continue la rubriche di **Mario Martinis** "Il grant lunari dal Friûl".

La sezion musicâl firmade di Natascia Gargano e dediche atenzion al gnûf fenomen de Basse Furlane, ven a stâi il grup Laipnessless. La Patrie dal Friûl di Avrîl si siera cu la rubriche di **Agnul Floramo** che, in rispueste ae retoriche des spesis previodudis pes celebracions de prime vuer mondiale, al propon une leture critiche di chel tragjic event storic. La Patrie dal Friûl e sarâ presentade martars ai 29 di Avrîl a Palme aes 5 e mieze li dal Municipi.

SCOLTADIS DI DRIUS

Plen di passion

Lui, ae morose, plen di passion: "Cjale ce biele lune" E je: "Parcè, atu di imbutiliâ?".



Cîl & Tiera, la prime riviste sientifiche in marilenghe

"Chestes riviste di alt nivel sientific e je une dimostrazion di cemût che si puedin insegnâ e pandi lis siencis ancje doprant la lenghe furlane; dal rest la dignitât e l'avignî di une lenghe si pesin su la sô potenzialitât e capacitât di pandi i concets plui alts de culture sientifiche e tecnologiche moderne". Chest il coment dal president de Provincie di Udin **Pietro Fontani** in relazione a Cîl & Tiera, la prime riviste di divulgazion sientifiche in marilenghe presentade lunis ai 14 di Avrîl a palaç Belgât tal ambit dai apontaments in program pe Fieste dal Friûl. Il prin numar de riviste, publicade de cjase editore Forum e direte dal prof. **Marzio Strassoldo**, al propon une interviste al retôr de Universitât dal Friûl, **Alberto Felice De Toni** e, in relazione ai setôrs di studi (macroeconomia, fisiche, meteorologie, biologie, economie ambientâl, chimi-



che e neurosiencis), articui di aprofondiment sul prodot interni lort tant che indicadôr di benistâ, sul clime e l'incuinement, su la evoluzion de vite su la tiera, sul valôr de agriculture pe societât, sul ciment armât e lis tecnichis antisimichis, sul leam jenfri neurosiencis e meditazion. In colaborazion cu la Societât sientifiche e tecnologiche furlane, l'Arlef e cul patrocini dal

Cirf (Centri interdepartimentâl universitari di ricercje su la culture e la lenghe dal Friûl) "chestes riviste - al spieghe il diretôr Strassoldo - e vûl dâ un aiût al lavôr di ducj chei che, tal ambit de scuele, de universitât e des aziendis, a intindin doprâ e valorizâ la marilenghe". La presentazion e je stade moderade dal diretôr dal Cirf, prof. **Paolo Pascolo**, e e à viodût la

partecipazion, oltri che dal President Fontani, ancje dal retôr dal Ateneu di Udin **Alberto Felice De Toni**, dal sindic **Furio Honsell**, di **Lorenzo Fabbro**, president de Arlef, di **Federico Vicario**, president de Societât Filologjiche Furlane, di **Pietro Pittaro**, president di Ent Friûl tal mont, e di **Alessandra Burelli** rappresentante de Societât sientifiche e tecnologiche furlane.